

Jeanroy

I.

Pro ai del chan essenhadors
Entorn mi et ensenhairitz:
Pratz e vergiers, albres e flors,
Voutas d'auzelhs e lays e critz,
Per lo dous termini suau,
Qu'en un petit de joy m'estau,
Den nulhs deportz no'm pot jauzir
Tan cum solatz d'amor valen.

II.

Las pimpas sian als pastors
Et als enfans burdens petitz,
E mias sion tals amors
Don ieu sia jauzens jauzitz!
Qu'ieu la sai bona tot'aitau
Ves son amic en greu loguau;
Per so'm sen trop soen marrir
Quar no n'ai so qu'al cor n'aten.

III.

Luenh es lo castelhs e la tors
On elha jay e sos maritz,
Et si per bos cosselladors
Cosselhan no suy enantitz
? Q'autre cosselhs petit m'en vau,
Aitant n'ay fin talan corau, ?
Alres noy a mais del murir,
S'alqun joy non ay en breumen.

IV.

Totz los vezis apel senhors
Del renh on sos joys fo noyritz,
E crey que'm sia grans honors
Quar ieu dels plus envilanitz
Cug que sion cortes lejau:
Ves l'amor qu'ins el cor m'enclau
Ai bon talant e bon albir,
E say qu'ilh n'a bon escien.

V.

Lai es mos cors si totz c'alhors
Non a ni sima ni raïtz,

Et en dormen sutz cobertors
Es lai ad lieis mos esperitz;
Et s'amors mi revert a mau
Car ieu l'am tant e lei non cau:
Tost verai ieu si per sufrir
N'atendrai mon bon jauzimen.

VI.

Ma voluntatz s'en vai lo cors,
La nueit el dia esclarzitz,
Laïntz per talant de son cors,
Mas tart mi ve e tart mi ditz:
«Amicx, fas elha, gilos brau
An comensat tal batestau
Que sera greus a departir,
Tro qu'abdui en siam jauzen».

VII.

Per so m'en creis plus ma dolors
Car non ai lieis en luecs aizitz,
Que tan no fau sospirs e plors
Que sols baizars per escaritz
Lo cor no m'tengues san e sau.
Bona es l'amors e molt provau,
E d'aquest mal mi pot guerir
Ses gart de metge sapien.

- letto 624 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/jeanroy-13>